

Den supplianten wert gegunt quijscheldinge van allen renten ende grontsisen, staende op huysen ende erven binnen 't bevanck van't dorp oft borcht, genaempt Armuyden, gevallen ende verschenen zedert dat tselve dorp deur den viant ingenomen werdt ende die noch vallen ende verschijnen sullen onthier ende Sinte Migeli dach vierentseventich eerstcomende met 't verloop van dien pro rata, ende bij den supplianten overleggende specificatye van den goeden, die se mainteneren binnen Middelburch te hebben. Sine Excellentie werdt op de restetucie van dien disponeren ofte duer Governuers ende Raden doen desponeren, zoo deselve in de redclickheyt bevinden zullen te behoren. Denselven supplianten werdt mede gegunt de faculteyt omme eenige bequame personen bij geschriefte te muegen overleveren, uuyt dewelcke deselve, oft Governuers ende Raden, een wettelijcke magistraet zal constitueren om binnen de jurisdictie des vorschreven borchs, Nieuerkercke ende Mortier recht ende justicie te administreren, zoo in krumenele als in ceville zaeken, op den voet ende instrucsie, als men procedeert ende doet binnen de

stadt Middelburch, behalven dat se daervan sullen staen ten resoorte aen den Raet van Holland in cas d'appel. Ende omme de goede borgers van't vorschreven borcht te bate te comen in't herbouwen van hueren huysen, Sijne Excellencie acordeert henlieden de gerechte helft van alle alsulcke demeynen ende incomen, als de Coninclijske Maiesteyt ende de stadt Middelburch aldaer plach te heffen, vor den tijt van eenen geheelen jare, alleenlijken uuytgesceyden de coren- ende soutmate, die blijven sal, daer se plach te wesen, welcke helft verdeelijcken zal zijn onder den borgeren, die voor Sinte Migiels daege meest al opgebouwet zullen hebben, ten advenant van elckers kosten, naer descretie van alsulken persoonen, als bij Governuers ende Raden te dien gedeputeert zullen worden, behoudens dat die van Armuyden in alles anders hen sullen draegen ende contribuieren als ende na advenant dat andere steden doen, Zijne Excellencie toegedaen wesende. Eyntelijcken zoe sullen de borgers van Armuyden vrijlijck moegen coopen ende vercoopen alle waeren ende coopmanschappen, comende van Oosten over zee, tzij dan in't grosse ofte te pennewarden, uuytgesondert de wolle lakennen, van dewelcke zijlieden egeen en sullen moegen vercoopen excederende den prijs van sessendertich stuyvers d'elle. Ende aengaende de westerse goeden ende waren, van dezelve en zullen se egeen voirder macht ende recht hebben om te verhandelen, dan zij voir date van de jegenwoirdige trubbels gehadt hebben. Alles bij provisie. Gedaen te Middelburch IX^{en} Martii 1574 a nativitate Domini.

Guillaume de Nassau.

Bij bevelc van Sinder Excelentye
Bruyninck.